

## I. DISPOSICIÓN XERAIS

### MINISTERIO DA PRESIDENCIA, RELACIÓNS COAS CORTES E IGUALDADE

- 10941** *Real decreto 951/2018, do 27 de xullo, polo que se establecen os limiares de renda e patrimonio familiar e as contías das bolsas e axudas ao estudo para o curso 2018-2019, e se modifica o Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.*

O cumprimento do deber constitucional de garantir a igualdade dos cidadáns no acceso á educación require a remoción de calquera obstáculo de natureza socioeconómica que dificulte ou impida o exercicio deste dereito fundamental. Máis alá da educación básica, as prestacións educativas perden as notas de obrigatoriedade e/ou gratuidade, pero a garantía constitucional do dereito á educación exige que ninguén quede excluído do acceso ao ensino de niveis que non sexan obrigatorios ou gratuítos por razóns socioeconómicas, para o cal é preciso establecer mecanismos de exención de taxas e prezos públicos ou de compensación destes gastos aos beneficiarios, a través de bolsas e axudas ao estudo. Deste modo, pode inferirse que o Constituínte fixou a obrigación dos poderes públicos de establecer un sistema de bolsas e axudas para garantir o dereito de todos á educación.

Neste sentido, o lexislador abordou estes aspectos, en cumprimento da súa responsabilidade contida no artigo 81.1 da Constitución («desenvolvemento dos dereitos fundamentais e das liberdades públicas»), no artigo 6.3.h) da Lei orgánica 8/1985, do 3 de xullo, reguladora do dereito á educación, no artigo 45 da Lei orgánica 6/2001, do 21 de decembro, de universidades, e no artigo 83 da Lei orgánica 2/2006, do 3 de maio, de educación. A través destas disposicións conformáronse as bolsas e axudas no ensino postobrigatorio como un elemento esencial do dereito á educación que se sustenta nun dobre principio: compensación das condicións socioeconómicas desfavorables dos seus beneficiarios e concesión en función do aproveitamento e rendemento escolar. Finalmente, o artigo 2.bis.3.e) da Lei orgánica 2/2006, do 3 de maio, define o Sistema estatal de bolsas e axudas ao estudo, en canto que garantía da igualdade de oportunidades no acceso á educación, como un dos instrumentos con que conta o Sistema educativo español para a consecución dos fins previstos no seu artigo 2.

Por outra parte, a disposición adicional novena da Lei 24/2005, do 18 de novembro, de reformas para o impulso da produtividade, estableceu a concesión directa ao alumnado de estudos regrados do sistema educativo, tanto universitarios como non universitarios, das bolsas e axudas ao estudo que se convoquen con cargo aos orzamentos do Ministerio de Educación para as cales non se fixe un número determinado de beneficiarios.

Pola súa vez, o Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, determina os elementos estruturais básicos do sistema: as modalidades das bolsas, as condicións académicas e económicas, os supostos de incompatibilidade, revogación e reintegro e cantos requisitos, condicións socioeconómicas ou outros factores sexan precisos para asegurar a igualdade no acceso á educación. En calquera caso, difírese a un real decreto anual a determinación de dous parámetros cuantitativos que, polo seu carácter conxuntural, non poden establecerse con carácter xeral: os limiares de renda e patrimonio cuxa superación determina a perda do dereito á obtención da bolsa ou axuda, e o importe dos diferentes compoñentes e contías das bolsas e axudas ao estudo. Este marco xurídico complétase, pois, con este real decreto que establece para o curso académico 2018-2019 as contías das bolsas e axudas ao estudo do Ministerio de Ciencia, Innovación e Universidades e do Ministerio de Educación e Formación Profesional, así como os limiares de patrimonio e renda familiar por encima dos cales desaparece o dereito á súa obtención. Debe sinalarse que adoptarán de maneira conxunta e a través dos mecanismos organizativos que se articulen o deseño, a planificación

e a dirección da política de bolsas e axudas ao estudo, de acordo coa disposición adicional sétima do Real decreto 865/2018, do 13 de xullo, polo que se desenvolve a estrutura orgánica básica do Ministerio de Ciencia, Innovación e Universidades.

O Goberno asume un compromiso firme coa dimensión social da educación e cunha política de bolsas e axudas ao estudo que garanta que ningún estudante abandone os seus estudos postobrigatorios por motivos económicos, asegurando así a cohesión social e a igualdade de oportunidades. Neste sentido, ten o firme propósito de revisar en profundidade o actual modelo de bolsas e axudas ao estudo mellorando o seu financiamento de maneira que poida incrementarse tanto o número de estudantes con bolsa como a contía das bolsas. Non obstante, para este próximo curso 2018-2019 non resultou posible abordar esta revisión, posto que se considerou prioritario manter o calendario previsto de tramitación do proxecto deste real decreto, así como a publicación da convocatoria para o dito curso, mantendo, así mesmo, os tradicionais prazos de presentación de solicitudes.

Introdúcese, non obstante, a elevación en 100 euros da contía fixa ligada á renda que perciben os estudantes de familias con menores rendas. Isto supón que a súa contía pasa dos actuais 1.500 a 1.600 euros.

Por outra parte, redúcese de 5,50 a 5,00 puntos a nota mínima requirida para obter bolsa de matrícula en primeiro curso de estudos universitarios ao tempo que se inclúe un novo compoñente ligado ao rendemento académico para todos aqueles bolseiros que obteñan unha nota media igual ou superior a 8,00 puntos. En consecuencia, modifícase o Real decreto 1721/2007, do 21 de decembro, para atender estas dúas últimas novidades.

Finalmente, seguindo o ditame aprobado polo Pleno do Congreso do 28 de setembro de 2017 incorpórase un tratamento específico para as solicitantes de bolsa que fosen declaradas vítimas de violencia de xénero e para os seus fillos e fillas menores de idade solicitantes de bolsa que fosen expostos á dita violencia de xénero, e exonéranse do cumprimento de certos requisitos académicos exixidos con carácter xeral para a obtención de bolsa.

Este real decreto figura no Plan anual normativo do Goberno para o ano 2018 e axústase aos principios de boa regulación contidos na Lei 39/2015, do 1 de outubro, do procedemento administrativo común das administracións públicas. Así, en canto ao principio de necesidade, xustifícase no mandato para o desenvolvemento regulamentario por parte do Goberno contido na disposición adicional novena da Lei 24/2005, do 18 de novembro, de reformas para o impulso da produtividade, así como na disposición adicional primeira do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas que encomenda ao Goberno a aprobación anual dun real decreto en que se especifiquen os parámetros económicos que rexerán a concesión de bolsas en cada curso académico, e no que concirne aos principios de proporcionalidade, seguridade xurídica, eficacia e eficiencia, consegue o seu obxectivo mediante a única alternativa posible, a aprobación dunha norma con rango de real decreto. Finalmente, cumpre o principio de transparencia xa que, de conformidade co previsto no artigo 26.6 da Lei 50/1997, do 27 de novembro, do Goberno, este real decreto foi sometido ao trámite de audiencia e información pública mediante a súa publicación no portal web do Ministerio de Educación e Formación Profesional.

A redacción dada á disposición adicional cuarta ten o seu fundamento na previsión introducida pola disposición derradeira décima cuarta da Lei de orzamentos xerais do Estado para 2018, ao modificar a Lei orgánica 6/2001, do 21 de decembro, de universidades, que permite que os prezos públicos por servizos académicos, para as ensinanzas de grao, no caso de primeira matrícula, que corresponde fixar ás comunidades autónomas, dentro dos límites establecidos pola Conferencia Xeral de Política Universitaria, poidan chegar a ser do 0 por 100 do custo do servizo. En tal suposto, de acordo coa normativa xeral de subvencións, a Administración xeral do Estado non podería compensar as universidades por un importe superior ao prezo fixado como custo do servizo pola correspondente comunidade autónoma.

Este real decreto foi obxecto de ditame do Consello Escolar do Estado e de informe do Consello de Universidades e do Consello de Estudantes Universitarios do Estado, e na súa tramitación foron consultadas as comunidades autónomas a través da Conferencia de

Educación e da Conferencia Xeral de Política Universitaria. Así mesmo, someteuse a consulta e información pública e foi obxecto de informe por parte dos ministerios de Facenda e de Política Territorial e Función Pública.

Na súa virtude, por proposta da ministra de Educación e Formación Profesional e do ministro de Ciencia, Innovación e Universidades, de acordo co Consello de Estado e logo de deliberación do Consello de Ministros na súa reunión do día 27 de xullo de 2018,

DISPOÑO:

CAPÍTULO I

### Disposicións xerais

#### Artigo 1. *Obxecto.*

Este real decreto ten por obxecto determinar os seguintes parámetros cuantitativos polos que se rexerán as convocatorias de bolsas e axudas ao estudo correspondentes ao curso académico 2018-2019, financiadas con cargo ao orzamento do Ministerio de Educación e Formación Profesional:

- a) A contía das diferentes modalidades das bolsas e axudas ao estudo reguladas no Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.
- b) Os limiares de renda e patrimonio familiar por encima dos cales desaparece o dereito á percepción das bolsas e axudas ao estudo.

#### Artigo 2. *Ámbito de aplicación.*

Para o curso académico 2018-2019 e con cargo aos créditos correspondentes dos orzamentos xerais do Estado, publicaranse as seguintes convocatorias de bolsas e axudas ao estudo, sen número determinado de persoas beneficiarias:

1. Convocatoria de bolsas e axudas ao estudo de carácter xeral, dirixidas ás seguintes ensinanzas:

- a) Bacharelato.
- b) Formación profesional de grao medio e de grao superior.
- c) Ensinanzas artísticas profesionais.
- d) Ensinanzas deportivas.
- e) Ensinanzas artísticas superiores.
- f) Estudos relixiosos superiores.
- g) Estudos militares superiores e de grao.
- h) Ensinanzas de idiomas realizadas en escolas oficiais de titularidade das administracións educativas, incluída a modalidade de distancia.
- i) Cursos de acceso e cursos de preparación para as probas de acceso á formación profesional e cursos de formación específicos para o acceso aos ciclos formativos de grao medio e de grao superior impartidos en centros públicos e en centros privados concertados que teñan autorizadas ensinanzas de formación profesional.
- j) Formación profesional básica.
- k) Ensinanzas universitarias adaptadas ao Espazo Europeo de Educación Superior conducentes a títulos oficiais de grao e de máster.
- l) Curso de preparación para o acceso á universidade de maiores de 25 anos impartido por universidades públicas.
- m) Créditos complementarios ou complementos de formación necesarios para o acceso ou obtención do máster e do grao.

2. Convocatoria de axudas ao estudo para estudantes con necesidade específica de apoio educativo.

## CAPÍTULO II

**Bolsas e axudas ao estudo de carácter xeral**

Artigo 3. *Contías das bolsas e axudas ao estudo de carácter xeral para as ensinanzas a que se refiren os parágrafos a) a j) do número 1 do artigo 2.*

1. As contías das bolsas e axudas ao estudo de carácter xeral para as ensinanzas indicadas nos parágrafos a) a j) do artigo 2.1 que se poderán percibir nos supostos previstos neste real decreto serán as seguintes:

- a) Contía fixa ligada á renda do solicitante: 1.600 euros.
- b) Contía fixa ligada á residencia do solicitante durante o curso: 1.500 euros. Non obstante, en ningún caso a dita contía poderá superar o custo real da prestación.
- c) Bolsa básica: 200 euros.
- d) Contía fixa ligada á excelencia no rendemento académico: entre 50 e 125 euros coa seguinte distribución:

Nota media do estudante	Contía en euros
Entre 8,00 e 8,49 puntos. . . . .	50
Entre 8,50 e 8,99 puntos. . . . .	75
Entre 9,00 e 9,49 puntos. . . . .	100
9,50 puntos ou máis. . . . .	125

- e) Contía variable: o seu importe mínimo será de 60 euros.

2. Os que cursen en modalidade presencial e matrícula completa os estudos enumerados nos parágrafos a), b), c), d), e), f) e g) do artigo 2.1 poderán percibir as contías fixas, incluída a bolsa básica, e a contía variable. Para a adxudicación da contía ligada á residencia do estudante durante o curso requirirase que o solicitante curse estudos presenciais cun número mínimo de horas lectivas que se determinarán en cada convocatoria e que acredite a necesidade de residir fóra do domicilio familiar durante o curso, por razón da distancia entre este e o centro docente, os medios de comunicación existentes e os horarios lectivos. Para estes efectos, considerarase como domicilio familiar o máis próximo ao centro docente do cal sexa titular ou no cal resida de forma habitual algún membro computable da unidade familiar, aínda que non coincida co domicilio legal do solicitante.

Os limiares de renda aplicables para a concesión das contías das bolsas previstas neste número serán os seguintes:

1.º Limiar 1: os solicitantes cuxa renda non supere o limiar 1 de renda familiar establecido neste real decreto poderán obter as contías a que se refiren os parágrafos a), b), d) e e) do número 1.

2.º Limiar 2: os solicitantes cuxa renda supere o limiar 1 e non supere o limiar 2 de renda familiar establecido neste real decreto poderán obter as contías a que se refiren os parágrafos b), c), d) e e) do número 1.

3.º Limiar 3: os solicitantes cuxa renda supere o limiar 2 e non supere o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa básica.

3. Os que cursen en modalidade distinta da presencial e matrícula completa os estudos enumerados no número 2 anterior poderán percibir a contía fixa ligada á excelencia no rendemento académico, a bolsa básica e a contía variable mínima.

Os limiares de renda aplicables para a concesión das contías das bolsas previstas neste número serán os seguintes:

1.º Limiar 2: os solicitantes cuxa renda non supere o limiar 2 de renda familiar establecido neste real decreto poderán obter a contía fixa ligada á excelencia no rendemento académico, a bolsa básica e a contía variable mínima.

2.º Limiar 3: os solicitantes cuxa renda supere o limiar 2 e non supere o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa básica.

4. Os que cursen os estudos enumerados nos parágrafos h), i) e j) do artigo 2.1, así como os que realicen o proxecto de fin de estudos ou opten por matrícula parcial poderán percibir a bolsa básica e a contía variable mínima.

Os limiares de renda aplicables para a concesión das contías das bolsas previstas neste número serán os seguintes:

1.º Limiar 2: os solicitantes cuxa renda non supere o limiar 2 de renda familiar establecido neste real decreto poderán obter a bolsa básica e a contía variable mínima.

2.º Limiar 3: os solicitantes cuxa renda supere o limiar 2 e non supere o limiar 3 de renda familiar establecido neste real decreto poderán obter unicamente a bolsa básica.

**Artigo 4.** *Contías das bolsas e axudas ao estudo de carácter xeral para as ensinanzas a que se refiren os parágrafos k), l) e m) do número 1 do artigo 2.*

1. As contías das bolsas de carácter xeral para as ensinanzas indicadas nos parágrafos k) a m) do artigo 2.1 que se poderán percibir nos supostos previstos neste real decreto serán as seguintes:

- a) Contía fixa ligada á renda do solicitante: 1.600 euros.
- b) Contía fixa ligada á residencia do solicitante durante o curso: 1.500 euros. Non obstante, a dita contía non poderá superar o custo real da prestación. En todo caso, para a adxudicación da contía ligada á residencia do estudante durante o curso requirirase que o solicitante curse estudos en modalidade presencial e acredite a necesidade de residir fóra do domicilio familiar durante o curso, por razón da distancia entre este e o centro docente, os medios de comunicación existentes e os horarios lectivos. Para estes efectos, considerarase como domicilio familiar o máis próximo ao centro docente que pertenza ou no cal resida de forma habitual algún membro computable da unidade familiar, aínda que non coincida co domicilio legal do solicitante.
- c) Contía fixa ligada á excelencia no rendemento académico: entre 50 e 125 euros coa seguinte distribución:

Nota media do estudante	Contía en euros
Entre 8,00 e 8,49 puntos. . . . .	50
Entre 8,50 e 8,99 puntos. . . . .	75
Entre 9,00 e 9,49 puntos. . . . .	100
9,50 puntos ou máis. . . . .	125

Para estes exclusivos efectos, á cualificación que se terá en conta no caso dos estudantes matriculados en segundos e posteriores cursos universitarios aplicaráselle un coeficiente corrector de 1,17 para os estudos da área de arquitectura e enxeñaría, de 1,11 para os estudos da área de ciencias e de 1,05 para os estudos da área de ciencias da saúde.

- d) Contía variable: o seu importe mínimo será de 60 euros.
- e) Bolsa de matrícula: comprenderá o prezo público oficial dos servizos académicos universitarios correspondente aos créditos en que se matriculase o estudante por primeira vez no curso 2018-2019.

Non formarán parte da bolsa de matrícula aqueles créditos que excedan o mínimo necesario para obter a titulación de que se trate.

No caso dos estudantes de universidades privadas, a contía desta bolsa de matrícula será igual ao prezo mínimo establecido pola comunidade autónoma para un estudo coa mesma experimentalidade nunha universidade pública desa mesma comunidade autónoma.

A compensación ás universidades das contías da bolsa de matrícula a que se refiren os parágrafos anteriores efectuarase conforme o previsto na disposición adicional cuarta.

2. Os que cursen os estudos enumerados no parágrafo k) do artigo 2.1 con matrícula completa poderán percibir as contías fixas, a contía variable e a bolsa de matrícula. Para a adjudicación da contía ligada á renda e a contía ligada á residencia do estudante durante o curso requirirase que o solicitante curse estudos na modalidade presencial.

Os limiares de renda aplicables para a concesión das contías das bolsas previstas neste número serán os seguintes:

1.º Limiar 1: os solicitantes cuxa renda non supere o limiar 1 de renda familiar establecido neste real decreto poderán obter as contías a que se refiren os parágrafos a), b), c), d) e e) do número 1.

2.º Limiar 2: os solicitantes cuxa renda supere o limiar 1 e non supere o limiar 2 de renda familiar establecido neste real decreto poderán obter as contías a que se refiren os parágrafos b), c), d) e e) do número 1.

3.º Limiar 3: os solicitantes cuxa renda supere o limiar 2 e non supere o limiar 3 de renda familiar establecido neste real decreto poderán obter a contía fixa ligada á excelencia no rendemento académico e a bolsa de matrícula.

3. Os que realicen o curso de preparación para o acceso á universidade de maiores de 25 anos impartido por universidades públicas, os que cursen complementos de formación ou unicamente realicen ben o traballo de fin de grao ben o máster, así como os que opten por matrícula parcial, poderán obter a bolsa de matrícula e a contía variable mínima.

Os limiares de renda aplicables para a concesión das contías das bolsas previstas neste número serán os seguintes:

1.º Limiar 2: os solicitantes cuxa renda non supere o limiar 2 de renda familiar establecido neste real decreto poderán obter a bolsa de matrícula e a contía variable mínima.

2.º Limiar 3: os solicitantes cuxa renda supere o limiar 2 e non supere o limiar 3 de renda familiar establecido neste real decreto poderán obter unicamente a bolsa de matrícula.

#### Artigo 5. *Contía variable.*

1. Os recursos asignados polo Ministerio de Educación e Formación Profesional para a convocatoria do curso escolar 2018-2019 de bolsas e axudas ao estudo de carácter xeral, a excepción daqueles que se destinen a compensar as bolsas de matrícula, aplicaranse en primeiro lugar á cobertura das bolsas básicas e das contías fixas ligadas á renda, á residencia e á excelencia no rendemento académico do solicitante segundo o indicado nos artigos 3 e 4, así como das contías adicionais previstas no artigo 6, as contías adicionais previstas na disposición adicional primeira e dos importes das contías variables mínimas indicadas nos artigos 3.3, 3.4 e 4.3 deste real decreto e nos artigos 12, 18.1, 19.1, 20.1, 22.2, 26 e disposición transitoria primeira do Real decreto 1721/2007, do 21 de decembro.

O importe que, se for o caso, reste tras realizar as operacións indicadas no parágrafo anterior, dependendo das dispoñibilidades orzamentarias, asignarase á cobertura da contía variable, que se distribuirá entre os solicitantes en función da renda familiar e do rendemento académico dos estudantes, mediante a aplicación da fórmula establecida no artigo 9.2 do Real decreto 1721/2007, do 21 de decembro. Os ministerios de Educación e Formación Profesional e de Ciencia, Innovación e Universidades determinarán de forma conxunta a porcentaxe do dito importe que se destinará á contía variable que corresponda, por unha parte, aos estudantes universitarios, de ensinanzas artísticas superiores, de estudos relixiosos superiores e de estudos militares superiores e de grao, e, por outra, aos demais estudantes non universitarios.

Para a concesión da contía variable, a renda do solicitante non poderá superar o limiar 2 de renda familiar establecido neste real decreto.

2. O importe reservado para compensar as bolsas de matrícula aboarase unha vez que se reciba no Ministerio de Educación e Formación Profesional a información das universidades sobre prezos públicos devindicados polos bolseiros aos cales corresponda a bolsa de matrícula, sen prexuízo da posibilidade de realizar pagamentos á conta ás universidades.



**Artigo 6. Contías adicionais.**

1. O importe que resulte da concesión das bolsas e axudas ao estudo establecidas nos artigos 3 e 4 deste real decreto incrementarase nunha das seguintes contías adicionais:

a) Conforme o mandato contido no artigo 138.1 da Constitución, as persoas beneficiarias de bolsas e axudas ao estudo con domicilio familiar na España insular ou en Ceuta ou Melilla que se vexan na necesidade de utilizar transporte marítimo ou aéreo para acceder ao centro docente en que cursen os seus estudos desde o seu domicilio disporán de 442 euros máis sobre a contía das bolsas e axudas ao estudo que lles correspondesen.

b) Esta cantidade adicional será de 623 euros para os bolseiros con domicilio familiar nas illas de Lanzarote, Fuerteventura, La Gomera, El Hierro e La Palma, Menorca, Ibiza e Formentera.

c) En caso de que o estudante teña que desprazarse entre as illas Baleares ou as illas Canarias e a península, as cantidades a que se refiren os parágrafos a) e b) anteriores serán de 888 e 937 euros, respectivamente.

2. As contías adicionais indicadas no número anterior serán tamén aplicables aos estudantes matriculados en centros oficiais de bacharelato a distancia que residan en territorio insular que careza de centro asociado ou colaborador.

## CAPÍTULO III

**Axudas ao estudo e subsidios para o alumnado con necesidade específica de apoio educativo****Artigo 7. Estudos comprendidos.**

1. Convocaranse axudas ao estudo e subsidios para o alumnado con necesidade específica de apoio educativo derivada de discapacidade ou trastorno grave de conduta ou asociada a alta capacidade intelectual que curse estudos nos niveis de segundo ciclo de educación infantil, educación primaria, educación secundaria obrigatoria, bacharelato, ciclos formativos de grao medio e de grao superior e formación profesional básica.

2. Os subsidios atenderán os gastos de comedor escolar e de transporte escolar e concederanse ao alumnado con necesidades educativas especiais que pertencan a familias numerosas. Para a concesión dos subsidios non se atenderá á renda nin ao patrimonio familiar.

3. Os compoñentes e contías das axudas e subsidios para o alumnado con necesidade específica de apoio educativo derivada de discapacidade ou trastorno grave de conduta serán os seguintes:

Compoñentes	Educación primaria, ESO e formación profesional básica	Resto de niveis educativos
	Contías – Euros	
Axuda de ensino. . . . .	Até 862	Até 862
Axuda ou subsidio de transporte escolar. . . . .	Até 617	Até 617
Axuda ou subsidio de comedor escolar. . . . .	Até 574	Até 574
Axuda de residencia escolar. . . . .	Até 1.795	Até 1.795
Axuda para transporte de fin de semana. . . . .	Até 442	Até 442
Axuda para transporte urbano. . . . .	Até 308	Até 308
Axuda para material escolar. . . . .	Até 105	Até 204
Axuda para reeducación pedagóxica. . . . .	Até 913	Até 913
Axuda para reeducación da linguaxe. . . . .	Até 913	Até 913

As contías establecidas na táboa anterior para as axudas ou subsidios de transporte incrementaranse até nun 50 % cando o alumnado presente unha discapacidade motora recoñecida superior ao 65 %.

Non se concederán axudas nin subsidios cando os gastos a que atenden estean cubertos suficientemente por servizos ou fondos públicos ou, se for o caso, por axudas concedidas aos centros para financiar o correspondente servizo. No nivel de educación infantil non se concederán axudas para material escolar.

4. O alumnado con altas capacidades intelectuais poderá obter, nos termos previstos no artigo 11 do Real decreto 1721/2007, do 21 de decembro, unha axuda de até 913 euros para o pagamento dos gastos derivados da inscrición e asistencia a programas específicos para este colectivo.

5. O limiar de renda aplicable para a concesión dos compoñentes das axudas ao estudo para o alumnado con necesidade específica de apoio educativo será o seguinte:

Número de membros da familia	Limiar – Euros
Familias dun membro . . . . .	11.937
Familias de dous membros . . . . .	19.444
Familias de tres membros . . . . .	25.534
Familias de catro membros . . . . .	30.287
Familias de cinco membros . . . . .	34.370
Familias de seis membros . . . . .	38.313
Familias de sete membros . . . . .	42.041
Familias de oito membros . . . . .	45.744

A partir do oitavo membro engadiranse 3.672 euros por cada novo membro computable da familia.

#### CAPÍTULO IV

##### Limiares de renda e patrimonio familiar

###### Artigo 8. *Limiares de renda familiar.*

1. De conformidade co previsto no parágrafo e) da disposición adicional primeira do Real decreto 1721/2007, do 21 de decembro, o limiar 1 de renda familiar para o curso 2018-2019 fixarase nas convocatorias que aproben o Ministerio de Educación e Formación Profesional e as administracións educativas competentes que asumisen o pleno exercicio das competencias previstas no dito real decreto.

O Ministerio de Educación e Formación Profesional financiará as bolsas suxeitas ao extremo inferior do intervalo recollido na seguinte táboa, incluíndo o compoñente da bolsa de matrícula nos termos establecidos na disposición adicional cuarta. As bolsas que se concedan aos estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e Formación Profesional e a comunidade autónoma convocante:

Número de membros da familia	Intervalo – Euros
Familias dun membro . . . . .	Entre 3.771 e 3.962.
Familias de dous membros . . . . .	Entre 7.278 e 7.646.
Familias de tres membros . . . . .	Entre 10.606 e 11.143.
Familias de catro membros . . . . .	Entre 13.909 e 14.613.
Familias de cinco membros . . . . .	Entre 17.206 e 18.076.



Número de membros da familia	Intervalo – Euros
Familias de seis membros . . . . .	Entre 20.430 e 21.463.
Familias de sete membros . . . . .	Entre 23.580 e 24.773.
Familias de oito membros . . . . .	Entre 26.660 e 28.009.

A partir do oitavo membro engadiranse entre 3.079 e 3.235 euros por cada novo membro computable da familia.

2. O limiar 2 de renda familiar para o curso 2018-2019 será o recollido na seguinte táboa:

Número de membros da familia	Limiar – Euros
Familias dun membro . . . . .	13.236
Familias de dous membros . . . . .	22.594
Familias de tres membros . . . . .	30.668
Familias de catro membros . . . . .	36.421
Familias de cinco membros . . . . .	40.708
Familias de seis membros . . . . .	43.945
Familias de sete membros . . . . .	47.146
Familias de oito membros . . . . .	50.333

A partir do oitavo membro engadiranse 3.181 euros por cada novo membro computable da familia.

3. De conformidade co previsto no parágrafo e) da disposición adicional primeira do Real decreto 1721/2007, do 21 de decembro, o limiar 3 de renda familiar para o curso 2018-2019 fixarase nas convocatorias que aproben o Ministerio de Educación e Formación Profesional e as administracións educativas competentes que asumisen o pleno exercicio das competencias previstas no dito real decreto.

O Ministerio de Educación e Formación Profesional financiará as bolsas suxeitas ao extremo inferior do intervalo recollido na seguinte táboa, incluíndo o compoñente da bolsa de matrícula nos termos establecidos na disposición adicional cuarta. As bolsas que se concedan aos estudantes cuxa renda familiar se sitúe dentro do intervalo fixado financiaranse ao cincuenta por cento entre o Ministerio de Educación e Formación Profesional e a comunidade autónoma convocante:

Número de membros da familia	Intervalo – Euros
Familias dun membro . . . . .	Entre 14.112 e 14.826.
Familias de dous membros . . . . .	Entre 24.089 e 25.308.
Familias de tres membros . . . . .	Entre 32.697 e 34.352.
Familias de catro membros . . . . .	Entre 38.831 e 40.796.
Familias de cinco membros . . . . .	Entre 43.402 e 45.598.
Familias de seis membros . . . . .	Entre 46.853 e 49.224.
Familias de sete membros . . . . .	Entre 50.267 e 52.810.
Familias de oito membros . . . . .	Entre 53.665 e 56.380.

A partir do oitavo membro engadiranse entre 3.391 e 3.562 euros por cada novo membro computable da familia.

**Artigo 9. *Cálculo da renda familiar.***

1. A renda familiar para efectos de bolsa ou axuda obterase por agregación das rendas de cada un dos membros computables da familia que obteñan ingresos de calquera natureza, calculadas segundo se indica nos números seguintes e de conformidade coa normativa reguladora do imposto sobre a renda das persoas físicas aplicable. Para efectos das bolsas e axudas ao estudo do curso 2018-2019, computarase o exercicio 2017.

2. Para a determinación da renda dos membros computables que presentasen declaración polo imposto sobre a renda das persoas físicas, procederase do modo seguinte:

a) Sumarase a base imponible xeral coa base imponible do aforro, excluíndo todos os saldos netos negativos de ganancias e perdas patrimoniais de 2013 a 2016 e o saldo neto negativo de rendementos do capital mobiliario de 2013 a 2016 a integrar na base imponible do aforro.

b) Deste resultado restarase a cota resultante da autoliquidación.

3. Para a determinación da renda dos demais membros computables que obteñan ingresos propios e non presentasen declaración polo imposto sobre a renda das persoas físicas seguirase o procedemento descrito no parágrafo a) do número 2 e do resultado obtido restaranse os pagamentos á conta efectuados.

**Artigo 10. *Deducións da renda familiar.***

No curso 2018-2019 aplicaranse as seguintes deducións da renda familiar:

a) O 50 % dos ingresos achegados por calquera membro computable da familia distinto dos sustentadores principais.

b) 525 euros por cada irmán que sexa membro computable e conviva no domicilio familiar, incluído o solicitante, cando se trate de familias numerosas de categoría xeral, e 800 euros se se trata de familias numerosas de categoría especial, sempre que teña dereito a este beneficio. Cando sexa o propio solicitante o titular da familia numerosa, as cantidades sinaladas serán computadas en relación cos fillos que a compoñan. Esta dedución será de até 2.000 euros na convocatoria de axudas para alumnado con necesidade específica de apoio educativo.

c) 1.811 euros por cada irmán ou fillo do solicitante ou o propio solicitante que presente discapacidade, legalmente recoñecida, de grao igual ou superior ao 33 %; ou 2.881 euros cando a discapacidade sexa de grao igual ou superior ao 65 %. Esta dedución será de 4.000 euros polo solicitante e outro tanto por cada un dos seus irmáns con discapacidade legalmente cualificada de grao igual ou superior ao 33 % na convocatoria de axudas para alumnado con necesidade específica de apoio educativo.

d) 1.176 euros por cada irmán do solicitante menor de 25 anos ou o propio solicitante que curse estudos universitarios e resida fóra do domicilio familiar, cando sexan dous ou máis os estudantes con residencia fóra do domicilio familiar por razón de estudos universitarios.

e) O 20 % da renda familiar cando o solicitante sexa orfo absoluto e menor de 25 anos.

**Artigo 11. *Outros limiares indicativos.***

1. Independentemente de cal sexa a renda familiar calculada segundo o disposto nos artigos 9 e 10, denegarase as bolsas ou axudas ao estudo solicitadas para o curso 2018-2019 cando se superen os limiares indicativos de patrimonio familiar que se fixan a continuación:

a) A suma dos valores catastrais dos predios urbanos que pertencen aos membros computables da familia, excluída a vivenda habitual, non poderá superar 42.900 euros. En caso de inmobles en que a data de efecto da última revisión catastral estiver comprendida entre o 1 de xaneiro de 1990 e o 31 de decembro de 2002 multiplicaranse os valores

catastrais por 0,49. No caso de que a data da mencionada revisión fose posterior ao 31 de decembro de 2002, os valores catastrais multiplicaranse polos coeficientes seguintes:

- Por 0,43, os revisados en 2003.
- Por 0,37, os revisados en 2004.
- Por 0,30, os revisados en 2005.
- Por 0,26, os revisados en 2006.
- Por 0,25, os revisados en 2007.
- Por 0,25, os revisados en 2008.
- Por 0,26, os revisados en 2009.
- Por 0,28, os revisados en 2010.
- Por 0,30, os revisados en 2011.
- Por 0,32, os revisados en 2012.
- Por 0,34, os revisados en 2013.
- Por 0,36, os revisados en 2014.
- Por 0,36, os revisados en 2015.
- Por 0,36, os revisados en 2016.
- Por 0,36, os revisados en 2017.

Nos inmobles enclavados na Comunidade Foral de Navarra, o valor catastral multiplicarase en todo caso por 0,50.

A Dirección Xeral do Catastro facilitará por medios telemáticos a consulta da información dos municipios que correspondan a cada unha das situacións indicadas, para os efectos de aplicación do coeficiente de ponderación.

b) A suma dos valores catastrais das construcións situadas en predios rústicos, excluído o valor catastral da construción que constitúa a vivenda habitual da familia, non poderá superar os 42.900 euros. Serán aplicables ás ditas construcións os coeficientes multiplicadores, en función do ano en que se efectuase a última revisión catastral, que se establecen no parágrafo a) anterior.

c) A suma dos valores catastrais dos predios rústicos excluídos os valores catastrais das construcións que pertencen aos membros computables da familia non poderá superar 13.130 euros por cada membro computable.

d) A suma de todos os rendementos netos reducidos do capital mobiliario máis o saldo neto positivo de todas as ganancias e perdas patrimoniais pertencente aos membros computables da familia non poderá superar 1.700 euros.

Non se incluírán nesta suma as subvencións recibidas para adquisición ou rehabilitación da vivenda habitual, a renda básica de emancipación nin o importe dos premios en metálico ou en especie obtidos pola participación en xogos, concursos, rifas ou combinacións aleatorias inferiores a 1.500 euros. As ganancias patrimoniais derivadas dos mencionados premios computaranse de acordo coa normativa do imposto sobre a renda das persoas físicas.

O valor destes elementos indicativos de patrimonio determinarase de conformidade co disposto na normativa aplicable do imposto sobre a renda das persoas físicas polo seu valor en 31 de decembro de 2017.

2. Cando sexan varios os elementos indicativos do patrimonio descritos no número anterior de que dispoñan os membros computables da familia, calcularase a porcentaxe de valor de cada elemento respecto do limiar correspondente. Denegarase as bolsas e axudas ao estudo solicitadas cando a suma das referidas porcentaxes supere o valor cen.

3. Tamén se denegará a bolsa ou axuda ao estudo solicitada cando se comprobe que a suma dos ingresos que se indican a continuación obtida polo conxunto dos membros computables da familia supere a cantidade de 155.500 euros:

a) Ingresos procedentes de actividades económicas en estimación directa ou en estimación obxectiva.

b) Ingresos procedentes dunha participación dos membros computables igual ou superior ao cincuenta por cento en actividades económicas desenvolvidas a través de

entidades sen personalidade xurídica ou calquera outra clase de entidade xurídica, unha vez aplicada aos ingresos totais das actividades a porcentaxe de participación nelas.

4. Para os efectos do cómputo do valor dos elementos a que se refiren os números anteriores, deducirase o 50 por cento do valor daqueles que pertencen a calquera membro computable da familia, excluídos os sustentadores principais.

Disposición adicional primeira. *Medidas específicas para compensar as desvantaxes dos estudantes universitarios con discapacidade.*

1. As contías fixas das bolsas e axudas ao estudo establecidas para os estudantes universitarios, a excepción das bolsas de matrícula, poderanse incrementar até nun 50 % cando o solicitante presente unha discapacidade legalmente cualificada de grao igual ou superior ao 65 %.

Non se concederán axudas cando os gastos a que atenden estean cubertos suficientemente por servizos ou fondos públicos.

2. Cando o solicitante presente unha discapacidade de grao igual ou superior ao 65 % legalmente cualificada, as deducións previstas nos parágrafos b) e c) do artigo 10 para o alumnado con necesidade específica de apoio educativo aplicaranse exclusivamente ao citado solicitante. Aos irmáns do solicitante seranlles de aplicación as deducións previstas con carácter xeral.

3. O número de créditos de que deban quedar matriculados e que deban superar os solicitantes de bolsas e axudas ao estudo establecerase nas convocatorias correspondentes e minorarase no caso dos estudantes con discapacidade legalmente cualificada, reducindo a carga lectiva necesaria para cumprir o requisito de matrícula nun 50 %, como máximo, cando o solicitante presente unha discapacidade de grao igual ou superior ao 65 %.

Disposición adicional segunda. *Vítimas de violencia de xénero.*

1. As solicitantes da convocatoria xeral de bolsas e axudas ao estudo correspondente ao curso académico 2018-2019 que, en virtude de sentenza condenatoria, orde de protección, resolución xudicial que acorde medidas cautelares para a protección da vítima ou, excepcionalmente, informe do Ministerio Fiscal que indique a existencia de indicios de que a demandante é vítima de violencia de xénero mentres non se dite a orde de protección, ditados entre o 30 de xuño de 2017 e o 30 de xuño de 2019 teñan a condición de vítimas de violencia de xénero e/ou os seus fillos e fillas menores de idade vítimas de violencia de xénero e soliciten as ditas bolsas e axudas ao estudo poderán obter no curso 2018-2019, sempre que cumpran todas as demais condicións previstas na normativa vixente, a bolsa básica, ou bolsa de matrícula segundo corresponda, a contía fixa ligada á renda, a contía fixa ligada á residencia e a contía variable que resulte da aplicación da fórmula, sen que lles sexan de aplicación os requisitos establecidos en relación coa carga lectiva superada no curso 2017-2018 nin o límite do número de anos con condición de bolseiro, nin a exigencia de superar unha determinada porcentaxe de créditos, materias, módulos ou horas no curso 2018-2019 para o que resultase beneficiario da bolsa.

2. As persoas a que se refire o número anterior, ademais de cumpriren os requisitos previstos nel, deberán:

a) Acreditar que no curso 2017-2018 se produciu un menor rendemento académico con causa directa na dita condición declarada por sentenza condenatoria, orde de protección, resolución xudicial que acorde medidas cautelares para a protección da vítima ou, excepcionalmente, informe do Ministerio Fiscal que indique a existencia de indicios de que a demandante é vítima de violencia de xénero mentres non se dite a orde de protección. Para isto deberán presentar, nos termos establecidos na convocatoria, unha certificación emitida ao respecto polo director do centro docente, á vista de informe emitido por un servizo especializado de orientación educativa. No caso de estudos universitarios, o dito informe emitirao o órgano colexiado de selección de bolseiros da correspondente universidade.

b) Matricularse no curso 2018-2019 do seguinte número de créditos, horas ou materias, como mínimo:

1.º Estudiantes de ensinanzas artísticas, estudos relixiosos e militares superiores: 30 créditos ou o 50 por cento do curso completo no caso de ensinanzas organizadas por materias.

2.º Estudiantes de grao superior de formación profesional, de artes plásticas e deseño e de ensinanzas deportivas: 500 horas.

3.º Estudiantes de bacharelato, ensinanzas profesionais de música e danza e grao medio de formación profesional, ensinanzas profesionais de artes plásticas e deseño e das ensinanzas deportivas: 4 materias ou 500 horas, respectivamente.

4.º Estudiantes universitarios: 30 créditos ou a metade do curso completo no caso de dotes titulacións de grao. Nestes casos, a bolsa de matrícula estenderase aos créditos que se matriculen tanto por primeira como por segunda vez.

Disposición adicional terceira. *Prolongación dos estudos universitarios.*

Naqueles supostos en que os requisitos e condicións aplicables permitan o disfrute de bolsas e axudas ao estudo durante un ou dous anos máis dos establecidos no plan de estudos da correspondente titulación universitaria, a convocatoria poderá establecer a contía das bolsas e axudas ao estudo que se concedan para o último destes cursos adicionais.

Disposición adicional cuarta. *Compensación ás universidades pola exención de matrícula.*

1. Durante o curso 2018-2019, o Ministerio de Educación e Formación Profesional achegará ás universidades, en concepto de compensación dos prezos públicos por servizos académicos correspondentes aos alumnos bolseiros exentos do seu pagamento, unha cantidade por alumno bolseiro igual á do prezo público fixado para a titulación correspondente no curso 2018-2019. No suposto de que o prezo do curso 2018-2019 fose superior ao vixente no curso 2011-2012, o Ministerio de Educación e Formación Profesional achegará ás universidades unha cantidade por alumno bolseiro igual á do prezo público fixado para a titulación correspondente no dito curso 2011-2012 actualizada nun 1 %, de conformidade co previsto no artigo 7.2 do Real decreto lei 14/2012, do 20 de abril, de medidas de racionalización do gasto público no ámbito educativo.

2. No caso de novas titulacións que non existisen no curso 2011-2012, o Ministerio de Educación e Formación Profesional compensará ás universidades o importe do prezo público fixado para a titulación correspondente no curso 2018-2019. No suposto de que o prezo do curso 2018-2019 fose superior ao fixado no curso 2011-2012 para titulacións do mesmo grao de experimentalidade na súa comunidade autónoma, actualizado nos termos previstos no número anterior, o Ministerio de Educación e Formación Profesional compensará esta última cantidade.

3. No suposto de bolseiros matriculados nos másteres que no curso de referencia 2011-2012 se denominaban «másteres con prezo diferenciado», o Ministerio de Educación e Formación Profesional compensará á universidade o importe do prezo público fixado para a titulación correspondente no curso 2018-2019 até un máximo de 2.100 euros.

4. O disposto nos parágrafos anteriores será tamén de aplicación á cuantificación da compensación polo Ministerio de Educación e Formación Profesional da bonificación do 50 por cento das matrículas correspondente a estudantes que pertencen a familias numerosas de tres fillos e asimiladas, e aplicarase, por tanto, un límite de 1.050 euros aos másteres a que se refire o número anterior.

5. Cando a cantidade achegada polo Ministerio de Educación e Formación Profesional á universidade pública resulte inferior ao custo das bolsas de matrícula, nos termos definidos no artigo 4.1.e), corresponderá á dita comunidade autónoma compensar as universidades públicas pola diferenza, de modo que o beneficiario da bolsa quede efectivamente exento de calquera obrigación económica.

Disposición transitoria primeira. *Convenios de cofinanciamento.*

Excepcionalmente para o curso 2018-2019, as comunidades autónomas que iniciasen a negociación para o traspaso das funcións e servizos en materia de xestión de bolsas e axudas ao estudo personalizadas, de conformidade co previsto na disposición adicional cuarta do Real decreto 1721/2007, do 21 de decembro, poderán acordar, a través dun convenio co Ministerio de Educación e Formación Profesional, a convocatoria e o cofinanciamento con cargo aos seus propios orzamentos do 50 por cento das bolsas que se concedan aos estudantes cuxa renda familiar se sitúe dentro do intervalo fixado no artigo 8, números 1 e 3.

Disposición transitoria segunda. *Renda familiar de estudantes con domicilio fiscal en Navarra.*

Para a concesión no curso académico 2018-2019 das bolsas e axudas ao estudo a que se refire este real decreto, no caso dos estudantes que obtivesen unha destas bolsas ou axudas ao estudo nos cursos 2016-2017 ou 2017-2018, para o cálculo do rendemento neto do traballo dos membros computables con domicilio fiscal na Comunidade Foral de Navarra practicarase a dedución prevista no parágrafo f) do número 2 do artigo 19 da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non residentes e sobre o patrimonio, así como a redución por obtención de rendementos do traballo prevista no artigo 20 da citada lei.

Disposición derradeira primeira. *Modificación do Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas.*

O Real decreto 1721/2007, do 21 de decembro, polo que se establece o réxime das bolsas e axudas ao estudo personalizadas, queda modificado como segue:

Un. O artigo 8 queda redactado nos seguintes termos:

«Artigo 8. *Compoñente das axudas nos niveis de ensino gratuíto.*

Nos niveis de ensino gratuíto poderanse conceder axudas para transporte, comedor e para a adquisición de libros e do material escolar necesario sempre que estes conceptos non estean suficientemente cubertos con servizos, fondos ou axudas públicas.

A estas convocatorias non lles serán de aplicación as normas reguladoras dos requisitos económicos contidas neste real decreto nin nos reais decretos anuais polos que se establecen os limiares de renda e patrimonio familiar e as contías das bolsas e axudas ao estudo personalizadas, salvo que se dispoña outra cousa na correspondente convocatoria.»

Dous. Modifícase o número 1 do artigo 9, que queda redactado nos seguintes termos:

«1. Contías fixas:

- a) Bolsa de matrícula. Todos os solicitantes que cursen estudos universitarios e que cumpran os requisitos establecidos na correspondente convocatoria terán dereito a percibir a bolsa de matrícula.
- b) Contía fixa ligada á renda do solicitante.
- c) Contía fixa ligada á residencia do estudante durante o curso escolar, cuxa contía non será, en ningún caso, superior ao custo real da prestación.
- d) Contía fixa ligada á excelencia no rendemento académico do solicitante.
- e) Bolsa básica.

Para cada curso académico fixaranse os importes a que se refiren os parágrafos b), c), d) e e) anteriores.»



Tres. Modifícase o segundo parágrafo do número 2 do artigo 9, que queda redactado nos seguintes termos:

«Os recursos asignados polo Ministerio de Educación e Formación Profesional para cada convocatoria, a excepción daqueles que se destinen a compensar as bolsas de matrícula, asignaranse en primeiro lugar á cobertura das contías indicadas nos parágrafos b), c), d) e e) do número anterior e ás que indiquen os reais decretos anuais que fixen os limiares económicos e os demais requisitos necesarios para obter bolsa ou axuda ao estudo, para todos os estudantes que resulten beneficiarios delas segundo establece a convocatoria. O importe que, se for o caso, reste tras realizar as operacións anteriormente indicadas, dependendo das dispoñibilidades orzamentarias asignarase á cobertura da contía variable, que se distribuirá entre os solicitantes de cada convocatoria en función da súa renda familiar e do seu rendemento académico, mediante a aplicación da seguinte fórmula:»

Catro. Modifícanse os números dous, tres e catro do artigo 14, que quedan redactados como segue:

«Artigo 14. *Membros computables.*

2. No caso de divorcio ou separación legal ou de feito dos pais non se considerará membro computable aquel deles que non conviva co solicitante da bolsa.

Non obstante, se for o caso, terá a consideración de membro computable e sustentador principal, o novo cónxuxe, parella, rexistrada ou non, ou persoa unida por análoga relación, cuxas rendas e patrimonio se incluírán dentro do cómputo da renda e patrimonio familiares. Así mesmo, terá a consideración de membro computable a persoa con ingresos propios que, na referida data, conviva no domicilio co solicitante cando non medie relación de parentesco e non se poida xustificar un alugamento de piso compartido.

3. Nos supostos en que o solicitante da bolsa ou axuda sexa un menor en situación de acollemento, será de aplicación á familia de acollida o disposto nos parágrafos anteriores. Cando se trate dun maior de idade, terá a consideración de non integrado na unidade familiar para estes efectos, sempre e cando de feito non subsistan as circunstancias de integración coa familia de acollida e así se acredite debidamente.

4. No caso de solicitantes que constitúan unidades familiares independentes, consideraranse membros computables e sustentadores principais o solicitante e o seu cónxuxe, a súa parella rexistrada ou non, que se encontre unida por análoga relación. Tamén serán membros computables os fillos, se os houber, que convivan no mesmo domicilio.»

Cinco. O segundo parágrafo do número 1 do artigo 18 quedará redactado nos seguintes termos:

«Os que cursen ensinanzas non presenciais ou os estudantes que utilicen a oferta específica para persoas adultas ou oferta de matrícula parcial poderán tamén obter a bolsa matriculándose de, ao menos, catro materias ou dun número de módulos cuxa suma horaria sexa igual ou superior a cincocentas horas, que deberán aprobar na súa totalidade para obtela no seguinte curso. Os bolseiros que cursen ensinanzas non presenciais poderán obter a contía fixa ligada á excelencia académica, a bolsa básica e a contía variable mínima. Os restantes bolseiros a que se refire este número unicamente poderán ser beneficiarios da bolsa básica e da contía variable mínima.»

Seis. O segundo parágrafo do número 1 do artigo 19 quedará redactado nos seguintes termos:

«Os que cursen ensinanzas non presenciais ou os estudantes que utilicen a oferta específica para persoas adultas ou a oferta de matrícula parcial poderán tamén

obter a bolsa matriculándose de, ao menos, un número de módulos cuxa suma horaria sexa igual ou superior a 500 horas, que deberán aprobar na súa totalidade para obtela no seguinte curso. Os bolseiros que cursen ensinanzas non presenciais poderán obter a contía fixa ligada á excelencia académica, a bolsa básica e a contía variable mínima. Os restantes bolseiros a que se refire este número unicamente poderán ser beneficiarios da bolsa básica e da contía variable mínima.»

Sete. Os números 1, 2 e o primeiro parágrafo do número 3 do artigo 23 quedan redactados como segue:

«1. Para obter, nas condicións previstas neste real decreto, as contías a que se refiren os parágrafos a), b), c) e d) do número 1, e o número 2 do artigo 9 deste real decreto, os que se matriculen por primeira vez de estudos oficiais de grao e, estando en posesión do título de bacharelato ou equivalente, accedan a través da avaliación de bacharelato para o acceso á universidade, deberán acreditar unha nota de acceso á universidade de 6,50 puntos, con exclusión da cualificación obtida nas probas das materias de opción do bloque das materias troncais. En calquera outro caso, deberán acreditar unha nota de 6,50 puntos na proba ou no ensino que lles permita o acceso á universidade.

2. Para obter, nas condicións previstas neste real decreto, a bolsa de matrícula como único compoñente, a puntuación a que se refire o parágrafo anterior será de 5,00 puntos.

3. Para obter, nas condicións previstas neste real decreto, as contías a que se refiren os parágrafos a), b), c) e d) do número 1, e o número 2 do artigo 9, os solicitantes de segundos e posteriores cursos de ensinanzas universitarias deberán ter superado nos últimos estudos cursados as seguintes porcentaxes dos créditos matriculados.»

Disposición derradeira segunda. *Título competencial e carácter de lexislación básica.*

Este real decreto ten carácter básico e dítase ao abeiro do artigo 149.1.30.<sup>a</sup> da Constitución, que reserva ao Estado a competencia para establecer as normas básicas para o desenvolvemento do dereito á educación, con obxecto de garantir a igualdade de todos os españois no seu exercicio.

Disposición derradeira terceira. *Desenvolvemento normativo e aplicación.*

1. Facúltanse a ministra de Educación e Formación Profesional e o ministro de Ciencia, Innovación e Universidades para ditar cantas disposicións sexan precisas para o desenvolvemento e execución do real decreto, no ámbito das súas competencias ou conxuntamente cando a disposición que se dite afecte ambos os ministerios.

2. Os órganos competentes adoptarán as medidas necesarias para a aplicación e mellor cumprimento do disposto neste real decreto e as súas normas de desenvolvemento e execución.

Disposición derradeira cuarta. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 27 de xullo de 2018.

FELIPE R.

A vicepresidenta do Goberno e ministra da Presidencia,  
Relacións coas Cortes e Igualdade,  
CARMEN CALVO POYATO